

**Innuttaasut inoqammut ajoqqusiisumik soorlu persuttaallutik aammalu toqutsillutik pinerluuteqartut pineqaatissinneqartarnerisa sivisussusaa ilumut naammattuunersoq pillugu oqallisissiatut siunnersuut**

(Inatsisartunut Ilaasortaq Bjørk Lange Olsen, Demokraatit)

**Akissuteqaat**

(Inuussutissarsiornermut, Niuernermet, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siunnersuuteqartup, Bjørk Lange Olsenip, Demokraatit, sammisamik massuminnga annertuumik pingaaruteqartumik oqallisigisassanngortitsineranut Naalakkersuisut qutsavigiumavaat.

Kalaallit Nunaanni inunnut navianaatilimmik pinerluttuliortarnerit killiffiisa qaffasippallaarujussuarnerat, aamma tamanna appartinniarlugu kikkut tamarmik peqataasariaqarnerat Naalakkersuisut isumaqatigaat. Nakuusernerit, siorasaarinerit toqutsinerillu ilaqutariinnut, ikinngutinut inuiaqatigiinnullu attugaasunut kingunerluutinik misigititsisarput.

Inuiaqatigiinni tamani pinerluttuliornernut pillaatissiissutissat pillugit apeqqut uteqqiattarpoq, aamma taamaattussaavoq. Tassami inuiaqatigiit ileqqullu piffissap ingerlanerani allanngoriartortarput. Eqqartuussiveqarnerup tatigineqarnera ataannassappat, pinerluttuliornernut suussutsinut assigiinngitsunut inuiaqatigiinnit iliuusereriikkanut kinguneritinneqartut aamma eqqugaasut inuiaqatigiillu naapertuilluartoqarneranik paasinninnerisa akornanni ataqatigiittoqassaaq. Naapertuilluartoqarnerata iliuusereriikkanullu kinguneqartitsisarnerup akornanni sunniivigeqatigiinneq “naapertuilluartoqarneranik misigisimanermik” taaneqartarpoq. Tamatuma peqatigisaanik aalajangiinerit, assersuutigalugu nammineersinnaajunnaarsitsinerup sunniutai pillugit ilisimatusarnermik tunngaveqartumik ilisimasanit, tunngaveqartinneqarnissaat aamma pingaaruteqarpoq.

Taamaammat Ilisimatusarfimmi ilisimatusartumik Naalakkersuisut suleqatigiinnissamik isumaqatigiissusiorsimapput, taassumalu “Kalaallit Nunaanni pinerluttulerineq pillugu inatsiseqartitsineq malillugu eqqartuussutit, pineqaatissiissutit aamma isummat” pillugit misissuineq suliarissavaa. Pineqaatissiisarnermi killiffik Kalaallit Nunaanni maannakkut pisoq, kiisalu innuttaasut pineqaatissiissutit qanoq killiffeqarnissaannut ilimagisaat misissuinerup tutsuiginartumik takutissavaa. Pineqaatissiissutit killiffiat misissuinermi peqataasut nalinginnaasumik isumaannut naleqqiullugu piviusuminngaanniit appasinnerusoq, taamaalillunilu imminut akerleriittoqartoq, siusinnerusukku misissuinerup takutissimavaa. Taamaalillutik, suliassanik piviusunik saqqummiussiffigineqarunik, piffissami tassani eqqartuussiviit sulisaasiannit naleqqiullugu amerlanerit sallaannerusumik eqqartuussisarussimapput.

Tamatuma saniatigut pineqaatissiissutip ukiunit 10-niit ukiunut 16-inut qaffanneqarnissaa Naalakkersuisut qallunaat naalakkersuisuinut noqqaassutiginkuuat. Pineqaatissiissutip sivitsorneqarneratigut eqqartuussiviit eqqartuussutinik killilikkanik piffissalinnik eqqartuussinissamik periarfissaat amerlissasut, Naalakkersuisuit isumaqarput.

Kisianni pineqaatissiisutit qaffasinnerusut imminni pinerluttuliortarnerit pillugit unammilligassanik aaqqiinissaat tamatuma kingunerinngilaa.

Tough-on-crime tassaavoq pinerluttuliornerit sakkortuumik kinguneqartinneqartarnerannik, aamma pillaassuteqartarnerup anusinngortitsiniutitut atorneqartarneranik pullaviusq. Pinerluttuliortunngoqqinnginnissap akornuserneqarnissaa anguniagaappat, maannakkumut tough-on-crime-imik pullavik iluatsilluartutut ersersinneqarsimanngilaq. Taamaammat nammineersinnaajunnaarsitsinermi pingaarnertut pinerluttuliortup inuiaqatigiinnit peersinneqarnissaa pineqassanersoq, imaluunniit nammineersinnaajunnaarsinneqarnerup nalaani pinerluttuliortoq pitsaasumik allannguuteqarnissaa aamma kissaatigineqarnersoq, inuiaqatigiinni oqallisigineqassaaq.

Taamaammat pinerluttuliortarnerup pitsaaliorneqarnissaa suli pingaarnersiuiinermi qaffasissumik inissisimatineqassasoq, ilaatigut pissutsit pinerluttuliornermik kinguneqartartut pitsaanerusumik suussusersineqartarnerisigut, Naalakkersuisut isumaqarput. Aamma ajorluinnartumik pisoqarpat, kingumut innuttaasutut inooqataasinnaalersitseqqinnermut tutsuiginartariaqartumik isumaqarneq pingaaruteqarpoq, taamaalilluni pinerluttuliortoq siunissamik pinerluttuliorfiunngitsumik inuuneqalernissamat ikorfartorneqassammat.

Inuuneq naallugu nammineersinnaajunnaarsitaaneq pillugu qanoq isumaqarnersugut siunnersuummik saqqummiussisup apeqqutigaa. Inuuneq naallugu nammineersinnaajunnaarsitaanermik eqqartuunneqarnissamat periarfissap inunnut navianaatilimmik pinerluttuliortarneq akornusernavianngikkaa, uunga Naalakkersuisut akissutigissavaat. Ullumikkut piffissaligaanngitsumik pineqaatissiisarneq, tigummigallagaaneq, pigaarput. Pineqaatissiissummik taamaattumik eqqartuunneqarnissap navianaateqarnera pissutigalugu inunnut navianaatilimmik amerlanerit pinerluttuliornaveersaartarnerat, arlaatigulluunniit ilimanarsisinneqanngilaq.

Misissuinerup aallartinneqarsimasup 2024-imi inerniliussai pillugit Naalakkersuisut nalunaaruteqarumaarput aamma sammisaq una annertuumik pingaaruteqartoq pillugu pitsaasumik oqallittoqarnissaa Naalakkersuisut kissaatigaat.